

Beim Dokter

=====

Der Hannes kummt zum Dokter med.,  
der frächt na glei, was er denn hätt?

"Früh wenn i aufsteh, Gott sei Dank,  
da sen mei Wadn immer schlank,  
doch amds, da hab i dicka Bee,  
ganz gschwolln, ball kann i nemmer steh,  
un wenn mer dann ins Fläsch neidrückt,  
bleim Dalln drin, des mecht mi verrückt.  
Des hab i früher doch nit ghat,  
Herr Dokter, gam Sie mer an Rat!"

"Ja, lieber Mann", secht der dann drauf,  
"i denk, Sie tun halt zu viel sauf,  
jetz müssn Sie dafür halt büß  
durch Ihr Malör mit gschwollna Füß!  
Des is a starka Wassersucht!" -

Des trifft den Hannes voller Wucht!  
"Was, Wasser? Na, des kann nit sei,  
i trink blos Bier un manchmal Wei,  
da allerdings kummt ziemli zamm,  
i saug des auf, grad wie a Schwamm.  
Und dem Getränk bleib i aa treu,  
i war scho immer wasserscheu;  
fürs Wasser bin i abstinent,  
des secht doch jeder, der mi kennt!  
Herr Dokter, Sie ham en Komplex,  
vom Wasser - na, da sauf i nex;  
des is doch für die Viecher da  
un höchstens aa nu für mei Fraa,  
weil die ken Alkohol verträcht -  
un dann nu, wenn sie Wäsch eiwächt. "